

Zirlai, hna zawng mek leh hna-thawh mek te tan Hostel fai leh thiangleim, ei leh in tuihnai, tui hniangleim, free wi-fi, two wheel-er free parking awm thlap, thlenin mamawh tan pawh man tlawm tein a thlen theih bawh e.

Rainbow Hostel
Y-131, MZU Road,
Luangmual, Aizawl
Ph. 9436140576 / 7005598481

Office : G-7, Chanmari,
Aizawl; Mizoram
796 007
Ph: 2341869
Website:
https://theaizawlpost.org
e-mail :
aizawlpost@rediffmail.com
theaizawlpost@gmail.com

Circulation Manager
7005598956

Mizoramah event nghtat turin sawm Tourism lama thawhdun dan sawi



Guwahati-a kal Tourism minister Lal-nghinglova Hmar chuan Inrinni khan Assam Tourism minister Ajanta Neog a kawm a, tourism hmasawna kawnga Assam leh Mizoram sawrkar thawh dun dan tur a sawipui. Event huaihawt thin ho chu Mizoramah rawn nghtat turin a sawm nghal bawh.

Minister hian Mizoram nikum September atanga rail connectivity a nei hnuah nasa takin khualzin an pung a. Mizoram tlawhtu khualzin tam zawk chu Assam atanga lokal an ni,

tiin, hei hian tourism kai-hnawihah state pahni inkara thawh dunna tha zawk nei a tul zia a tilang a, thawhahona nghtat zawk an nei a beisei tih a sawi.

Assam Tourism minister hian Mizoram nena thawh dunna tha nei chu Assam duhtusam a ni a, state pahni tana thil lawmawm a ni tih a sawi ve bawh.

State pahni Tourism minister hian department kaltlanga thawhahona mumal zawk nei tha an ti a. India rama langtham tourism-a hmasawna chak leh langsar nei tur chuan Assam leh

Mizoram bakah hmarchhak state zawng zawng thawhho tlan a pawimawh tih an sawi a ni.

Mizoram sawrkarin kumin chhunga tourism event leh festival hmachhawp a neihte Assam Tourism minister hi Lal-nghinglova Hmar hian hrilhin, Mizoram lo tlawh a, festival hmanpui turin a sawm a. Ajanta Neog pawhin lo zin ngei a tum tih a hrilh a ni.

Mizoram minister hi Guwahati-a hman - event mangament, tourism leh hospitality lama company lian leh langarte

Police constable 275-in zir tur inzir zo Hnathawk tlak lo chawl turin kan duh - Chief minister

Aizawl, July 20 Thenzawla Police Training School (PTS) a police constable training batch 70-na chu Inrinni khan an hun hman tur ang hman zoin an chhuak a. An pula 'passing out parade' nei chu chief minister Lalduhoma leh Home minister K Sapdanga ten an hmanpui.

Chief minister chuan, sawrkar hna chu 'equality for all principle' changchawiin dik tak zelin lak a ni a. Thalaite pawhin sawrkarah rinna an nei thar zel a. Tuna police lak thar 275 pawh hi duhsak bikna emaw sawipuitu minister leh politician tel loa, intihsiakna

fair tak kaltlanga tling an ni a, an chhuanawm tih a sawi.

Hnathawktu qualify-ten kan ram tan quality service an pek an ring tih sawiin, "Nangni pawh hi chutianga hna rawn thawh tur chuan kan beisei zui dawn che u. Sawrkar hian service tha kan

duh avangin qualify lo chu huai takin kan hnawl a. Hnathawktu lak tharah chauh hei hi kan kalpui loa, tuna a thawh mekte zingah pawh chhawr tlak loh dapchhuah hna kan kalpui a, special pension scheme-in chhuak ngei se kan duh," a ti.

Khawvel ram tin

zirchianin, police tha nei ramah khawtlang nun a ralmuang thin tih chief minister hian a sawi a. Police nungchang tha leh service tha chuan ram leh hnam hmeh an timawi a, mipui an thlamuan a, sawrkarah lungawina an pe tih a sawi. Tun amite pawh a tling leh

tlak thlankhawm an nih angin, mipui thlamuan a, khawtlang nun leh ram leh hnam tihmawi hna an thawh turah an ngai tih a sawi a ni.

PTS-ah hapta 45 chhung an hnathawhna lama an mamawh thiamna chi hrang hrang an zir hnu ah, hna thawh tura chher hriam, inpeih at an ni ta tih sawiin, "In-ringtawh taka hna thawh turin theihna in nei tawh a. Police hna in thawhna kawngah, dan bawhchhetute in chhuina kawngah, misual in chhui chhuah-ten hremna an hmuhna tura hma in lakna kawngah, dan kenkawhna

VIKSIT BHARAT CHU NANGMAHAH A INTAN, I ITR KA HUN TAKAH THEH LUT RAWH

Individual &
HUF filing
ITR-1* or ITR 2*



JULY 2026

Assessment Year : 2026-2027 | Financial Year : 2025 - 2026

Note: Assessment Year 2026-27 atana Income Tax Return (ITR) thehluh hi Income Tax Act, 1961 hmanga tih tur a ni.

Hriattur Pawimawh

- I ITR kha e-filing portal (eportal.incometax.gov.in) atangin theh lut rawh.
- Ram pawn bank account, asset emaw sum laklulh in nei chuan ITR 2 leh Schedule FA/FSI ah i thehlut ngei tur a ni.

ITR A HUN TAKA FILL THATNA



A hun taka ITR file-in late fees leh interest pumpelh rawh



ITR hi siamthat theih a ni

RANG TAKA KIRLEHNA



I return thehluh hman i AIS/TIS/26AS te kha i enfiah tur a mi.



DS dik tak chauh va claims rawh.



Deductions leh exemptions dik lo claims suh.



Income dik takin pe rawh.



Chhiah petute chuan e-filing portal-a an mobile number, address, email ID, leh bank details a dij in an update ngei tur a ni, Income Tax Department chuan heng biak pawh na hmang chauh hian contact thin a ni.

* ITR-1: India rama cheng nghtat, kum khata a vaia sum laklulh tling khawm Rs. nuai 50 aia tam lo nei mimal tan a ni. He form hmang tur hian atang te, two house properties atang te, pawisa pung atang te, section 112A hnuia long-term capital gains Rs. nuai 1.25 aia tam lo nei te, agricultural income atanga sum laklulh Rs. 5,000/- aia tam lo nei tan a ni.

* TR-2: Mimal leh HUFs sumdawna emaw mahni eizawna bik atanga hlawnah leh sum laklulh nei lo te tan a ni.



Hre chiang duh leh chhawmdawlna mamawh tan
Income Tax Department website: www.incometaxindia.gov.in a
Kar Saathi Chatbot' kha tlawh rawh



Income Tax Department
Government of India

Hre chiang duh tana
luhna tur
www.incometaxindia.gov.in



Scan the QR
code for more
information



Scan the QR code to visit
the e-filing portal.
Website
eportal.incometax.gov.in/iec/tiservices/#/login

@incometaxindiaofficial

@IncomeTaxIndia

@incometaxindiaofficial

@incometaxindia.official

@incometaxindiaofficial

Mizotaxi app-ah sang chuang inziak lut tawh

POST NEWS SERVICE

July ni 1 atangin Aizawlah Mizotaxi app hman tur a ni a, mahse taxi-pute an la inziak lut tlem hle. Mi 1100 chuang an la ni chauh.

July ni 17, kar hmasa Zirtawpni thlang khan he app hmang tur hian taxi-pu 1165 an inziak lut tawh.

Mizotaxi app hi four wheeler taxi, two wheeler taxi leh autorickshaw te hman tura tih a ni a, State Transport Authority thurel a ni.

An chhinchhiah danin, kar hmasa Zirtawpni thlang khan four wheeler taxi 335 an inziak lut tawh a, two wheeler taxi 812 leh autorickshaw 18 an inziak lut tawh.

Inziah luh (registration) dilte zingah 133 chu an hnawl a, hei hi lirthei leh a khalhtute document fel loh vang a ni tih thu dawn a ni.

Mipui lamah mi 21413-in Mizotaxi app hman tumin an download tawh a, mahse lirthei lam an inziah luh tlem avangin he app hmanga lirthei book chungchang pawh harsatna a awm tih thu dawn a ni.

Taxi leh autorickshaw khalhtu tam zawk chuan he app hi hman an tum rih lo niin a lang a, court-a khin pawh an tum mek.

Taxi khalhtute chuan anmahni hmangtuteah (passenger) pawh app hmang thiam lo tur, he app hi hmang lo tura ngen an awm thin tih an sawi.

Mizotaxi app hian a tir atangin ngaihven a hlawn a, inhnialna pawh a hring chhuak nghal. Politics-a inbeihna a tling zui a, chutiang karah chuan hman tan a ni. Mahse July chawhma lam la la atangin a thawm hi a zawi telh a, a tir lam angin tunah chuan sawi leh khel a hlawn vak tawh lo.

Dan anga kal chuan FCRA hlahuh tur awm lo

- *MBJP state GS*

Foreign Contribution Regulation Act (FCRA) license cancel sak zingah Hindu NGO-te pawh an awm a, Kristiante nek-cphey tumna a ni loa, dan ang taka kal chuan hlahuh tur a awm lo tih BJP Mizoram hruiatu Delson Notlia chuan a sawi.

July 17-a an party office-a inkhawmah BJP State general secretary Delson Notlia, MDC chuan, FCRA chungchanganh Congress party-in mipui thluak suk tumin, kohhran leh NGO thlenga an politics ball atana hmanruaa hman an tum chu an chak tawh loh zia leh central leh Mizoramah pawh awmzia

an neih tawh loh zia lanna a ni tih a sawi.

FCRA chu central-a Congress sawrkar lai, kum 1976-a dan an siam a ni a, chu chu Congress sawrkar lai bawh, kum 2010 khan repeal leh niin, chumi kalzelah chuan BJP kai-hhruai sawrkarin FCRA chungchang a zirchian-naah FCRA hmansualna a tam hle tih a hmu chuak a, firfiak (terrorist) te thlenga hman khawlohna a awm avang leh sum kan dawn ang kan hman leh thin loh avangin, FCRA kalphung siamthat hi sawrkar laipui chuan tul tiin hma a la mai zawk tih a sawi na ni.

“FCRA vanga kan

property-te chhuhsak theih anga thudik tawh lo hman-ga Congress party-in a sawi hi mipui bumna a ni. Tunah hian FCRA cancel sak 22498 an awm tawh a, hetah hian Hindu NGO, Muslim NGO leh Kristian NGO pawh an awm. Tuna FCRA dan zawma active hi 14455 an awm a, felfai taka an sum hmuh a hman-na tur anga hman emaw FCRA duhdan anga kan kal emaw chuan engmah hlahuh tur a awm lo tih hi Mizoram mipuiin kan hri-at a ngai,” a ti.

Congress party-in tunhma atang tawhin Mizoram mipui min bum reng thin, tiin, kar thara

‘Black Day’ hman an tum pawh a zahthlak hle a, BJP-in ‘Emergency Black Day’ an hman dan nen tehkhinin a zahthlak takzet tih Delson Notlia hian a sawi.

India ram state thenkhata Kristian tih-duhdahna a thlen changa lawm ber chu Mizorama Congress party an ni tih pawh sawiin, “A chhan chu, policy hralh tur mum-al an nei tawh siloa, Mizo mipui sakuana hmanga tih thaih bak campaign auhla pakhat mah an neih loh avangin, Kristiante tihduhdah an nih hian lawm thei hle in a rinawm. Tunlai hi internet khawvel

a nih tawh avangin, thalai tam tak leh nu leh pate pawhin thudik hi an kutah an keng vek tawh a, Mizo mipui hian BJP hi an hlau tawh loa, Congress party zawkin dawt hmanga min lo bum thinna phuba an la tawh a, MLA pakhat chiah Mizoramah Congress party chuan a nei tawh,” State BJP hruiatu hian a ti.

Congress-in Black Day phuahchawp hman-ga an party mite chauh ni lo, mipui mai pawh ni lo, kohhran leh NGO-te ball atana hman an tumna rilru chu a tenawmin, kohhran leh NGO-te zahlohna lian takah a ngaih theih tih a sawi a ni.

Jubilee pualin Gorkha thalai hnatlang

Mizoram Gorkha Youth Association (Central) chuan an pawl kum 50 thin lawmna kalzelah Inrinni khan Aizawl veng 12 leh district khawpui 3 bakah Vairengte-ah Faina Beihpui hnatlang an huai-hawt a, heng hnatlangah hian MGYA member 600 chuang an thawkchhuak.

Aizawl khawpui chhunga MGYA Branch 12 chuan Aizawl kawngpui engemawzat – Zotlang-Vaivakawn kawngdung, Jail Veng- Vanapa Hall kawngdung, Bawngkawn Main Road, Bawngkawn to Durtlang Raod, Dinthar- Vaivakawn Road leh kawngdung dang 10



chuangah bawhlhlawh thianfaian kawngdung an tifa a. Lunglei, Siaha, Kolasib, Bualpui leh Vairengte-a MGYA Branch pawhin an khawpuiah theuh faina beihpui thlakian an hnatlang bawh.

MGYA hi Mizora-

ma Gorkha pawl lian ber niin kum 1976-a din a ni a, member 5000 vel an awm mek. Kumin August 18 khian Golden Jubilee lawm tumin an inbuatsaih a, tuna faina hnatlang hi he an kum 50-na thin lawmna peng pakhat a ni.

Brain Tumor enkawlnaah hmasawonna thar

Tun hnaia neurosurgery leh damdawi thiamna lo changltung zelah, thluak bawh (brain tumor) enkawlna pawh a hma aiin a himin a hlawhtling zawk tawh niin mithiamte chuan an sawi.

Thluak bawh zawng zawng hi cancer an ni vek kher lo va, enkawlna pawh a bawh dan azirin a inang lo a, a tir tea hmuh chhuah leh enkawl vat a nihin a zual zel tur a veng thei tih an sawi.

Hemi chungchanganh hian, Dr. Anurag Gupta, Associate Director & Head of the Unit – Neurosurgery (Max Super Speciality Hospital, Saket) chuan, “Thluak bawh hi thluak chhunga hna thawktu cell-te pangngai lo taka an lo pun thur thur avanga lo awm a ni. Bawh dangte chu taksa peng dang can-

cer atanga thluaka lo darh chhawng an ni a. Thluak bawh hi a hlauhawm loh (benign) leh a hlauhawm (malignant) chi a awm a. A hlauhawm loh chi te hi muangchanga thang thin ni mah se, thluak hmun pawimawh tak tak an nek beh thin avangin harsatna lian tak an thlen thei tho,” tiin a sawi.

Thluak bawh lan chhuah dan (symptom) hi a lenzawng (size) leh awmna hmuna a ingnat a. Luhai/lu na ngut ngut, Kaih (seizures), khaw hmuh fiah loh te, tawng fiah loh te, hriatna hloh leh mizia danglam thut te, ban leh ke zawi te, leh taksa inbuktawkna hloh te hi a lan chhuah dan a ni a. Dr. Gupta chuan hetiang symptom nei te chu ngaihthah lo va, inentir vat turin a chah a ni.

He natna enkawlna kawngah hian zai (surgery) hi a pawimawh ber berte zinga mi a la ni a. Surgery hian natna nihna tak finfiah nan te, thluak tawt lutuk tihziawm nan te, bawh zai chhuah nan te, taksa chet phung enkawlna (therapy) dang pek hmaaa bawh lo tihhniam nan te a pui thin a. He natna zai nan hian ‘craniotomy’ (lu ruh tlem zai hawn) hi hman uar ber a ni.

Enkawlna hi zai chauh ni lovin, radiation therapy te, chemotherapy te, bawh tan bika enkawlna (targeted treatments) te nen a kal kawp thin a. Damlo hrang hrangte mamawh ang zela enkawlna dik tak siamsak tur hian doctor thiam hrang hrangte tangrual (multidisciplinary team)-in hma an la thin a ni.

Ka tawngkam avanga thubuai min siamsakna kha inremin kan titawp

- *K Vanlalvena*

State pahnih ramria buaina chhuah laia a tawngkam avanga Assam sawrkarin thubuai a siamsak chu a hnu ah inrem-siamin an titawp tih MP kalchhuak ta K Vanlalvena chuan a sawi.

Rajya Sabha MP atanga chawl a K Vanlalvena hian thuthar thehdarhtute zawhna chhangin, Mizoram leh Assam inkara ramri buaina chhuah laia Assam chief minister thusawi chung-

chawng TV interview-a zawhna a chhannaa a tawngkam dengkhawn deuh avang khan Assam Police-in Dholai Police Station-ah thubuai siamsakin, Delhi-ah mamumin an rawn kal a, Delhi Police leh Mizoram House hotute nen saw-ihoim nan loin an an hawsan leh a. Hei vang

hian MNF Legal Board hmalakna in Vairengte Police Station-ah Assam CM Himanta Biswa Sarma lakah thubuai an thehlut ve thung a, hemi hnu hian Assam sawrkar duhdan angin an thubuai thehlut ve ve hi hnukkin, hma lak zui a ni ta lo ve ve tih a sawi a ni.

MP a nih chhunga hma a lakna thenkhat a tarlan zingah, Mizoram chhim tawp leh Tuifinri-at inkalpawhna kawngpui KMMTTP road laih mek, kum thum dawn hna thawh mumal awm loa chawhlhsan chu a hmun ngeiah kalin, Myanmar ram chhung thui tak luta a thil hmuh chu India sawrkar hotute hnenah report pe in, chak taka hna thawh chhunzawm tura a ngenna chu a hlawhtlinna hmu a ni mek a. KMMTTP road

pawh tun atanga reiloteah siam zawh thuai beisei a ni tih a sawi.

Mizoram chhim tawp Zorinpui/ Hmawngbu chhuah thlenga Siairang rel kawng chhunzawmna tura Railway Ministry-a vawi engemawzat ngenna a lo thlen thin chu sawrkar laipui chuan pawmsakin preliminary survey hna pawh thawh zawh khat a ni tawh tih a sawi bawh.

Union Home ministry-a ziaik leh tawngkam a thlen, Tlabung bul Khawthlangtupui chung-gah lirthei lian zawh theih lei (permanent bridge) siam tura a ngenna chu tih hlawhtlin a ni a. Ministry of Home Affairs chuan he lei dawhna atan hian cheng vaibelchhe 54 chuang a sanction a, lei hi dawh mek a ni tawh tih a sawi a ni.

Bawhlhlawh paih lohna tur hmuna paihtu LC-in an man

Hlimen Veng huamchhunga bawhlhlawh paihna tur hmun tura ruat ni si loa in sakna bungraw hlui paihtu lirthei man an ni.

Hlimen Local Council sawi danin, a huamchhung, Tuikhuahtlang thlanmual piah ‘Bawngin Mual’ kawngah bawhlhlawh paih ruk a tam a, July 14 zing dar 10.00 vel khan truck MZ 01 AB 7506, Lalnunsiana Bung-kawn khalh chuan bawhlhawh phurin paih ruk a

Branch din champha vawi 80-na lawm

YMA Ailawng Branch chuan Inrinni khan an din champha vawi 80-na, Oak Jubilee an lawm a. Dampa bialtu MLA Dr R Lalthangliana’n a hmanpui.

MLA chuan, YMA anga kohhran leh political party thliar ve lo, hlawh leh lawmman pawh phut loa chanhai leh riangvai tanpui ngaite tanpui thin pawl thianghlim leh pawl zahawm khawvel hmun dangah an awm ve lo tih a sawi a. Tawng khat hman, chhiat ni that ni, rikrum thila che chhuak zung zung thin kan nei chu

tum lai man a ni a. AMC Solid Waste Management bye laws rule No.4.1to 4.3 angin Rs. 5000 chawitir a ni a, seizure memo pek niin sumfai hi Aizawl Municipal Corporation-a pe tura tih a ni.

July 16 zan dar 8.30 vel khan truck MZ 01-V -8801, a khalhtu Lalnuan-sanga chuan in thiahna leh bawhlhlawh phurin heng lai hmuhah vek hian paih ruk a tum lai man a ni a. AMC dan tlawhchhan bawh hian

kan vannei a, khawvela NGO pawl nei tha ber kan ni a ring tih a sawi.

“Tunhma khan hnamdangten tlawmgaihna hi Mizo culture-a bet tlata ngaihna an lo nei tawh thin a, hnamdang hian mithi lumennaah pawh khawhar chhungte hnemna tur hla an nei ve lo. Chuvangin Mizote hi kan vannei chungchuan hle,” a ti.

Thalaitaah Mizoram a chhiat a thata mawh-phurhna la ngam, Mizo nationalism-a Chiang, hnam thinlung pu an pung thar ta chu a lawmawm tih Dr R Lalthangliana hian

Rs. 5000 chawi tura tih a ni tih a sawi bawh.

Helai hmuna bawhlhlawh paih ruk tum an man thu thehdarh a ni reng chung pawha veng pawn atanga bawhlhlawh paih ruk tum an awm thin chu Hlimen khawtlang zah lohna leh ram dan pawisak lohna lian tak niin an hria tih Hlimen Local Council hian sawiin, bawhlhlawh phur lo ngaihven a, report petute chungah lawmthu an sawi tih a sawi.

a sawi a. Central service hrang hrangah Mizote kan tlahniam ta hle, tiin, hnamdangte tih theih ang kan ti ve thei thi hre tura a chah bakah sawrkar hna sang hrang hrang chu hnamdangten min khalh tak zel avangin zima kawng hrang hrangah zirlaiten tan la thar a, taimakna nen theitawp chhuah thar leh turin a fuih tih a sawi a ni.

Din champha kum 80-na an hman thei chu Pathian kaihhruaina vang liau liau a ni tih hre tura chahin, a lawmpui a, duhsakna sang ber a hlan tih a sawi.

Traffic dan bawhchhia 220 man

Aizawl Traffic Police chuan dan bawhchhiatna hrang hrang avanga lirthei chetsualna thleng thin ti tlem tur leh mipui him zawkna atan July 19 - Pathi-anni chawhnu khan Aizawl khawpui hmun hrang hrangah ‘special drive’ a nei leh a, dan bawhchhiatna hrang hranga inhnamnawih mi 220 an man.

Helmet khum loa ke hnih nei lirthei khalh chu dan bawhchhia zinga tam ber a ni a, 131 a ni. Driving license nei loa lirthei khalh 27, dan phal baka bike ri ring 10, kumtlinglo lirthei khalh 6, rui chungah lirthei

Police constable 275-in zir tur inzir zo Hnathawk tlak lo chawl turin kan duh



(phek hma zawmna...) kawngah tu mitnei mah veng suh u. Dik takin thawk ula, dan hi lal ber rawh se,” Lalduhoma hian a ti.

Mizoramah zu vanga service laia thi police kan tam thin hle a, chu chu a tur ve renga ngaih a ni tawh emaw tih tur a ni tih a sawi.

Police-te chu taksa hrisel tak nei tura beisei an ni a, service-a lut tur pawhin physical fitness exam a a tel, tiin, a taka hna an thawh huna pawh physical fitness chu chhawm zel tur a ni tih a sawi. Police tihhma-sawn hna an kalpui zui zel dawn a, sualna lo chhuak thar zel hmachawn thei

tur leh misualte hmakhaha kal zat zat thei tura thum chak an duh tih a sawi bawh.

Mizoram DGP Pu Sharad Agarwal pawhin training chhuakte a taka hna an thawh huna an hriat tur hrang hrang a sawi a ni.

Police constable training chhuakte hi mipa 249 leh hmeichhia 26, an vaiin mi 275 an ni a. Trainee-te hi Armed branch atangin mi 198, unarmed branch atangin mi 51, Mechanical branch atangin mi 8 leh compassionate grounds-in mi 18 an ni. Training neih chhunga ti tha bik th-lanchhuahte hnenah lawmman hlan an ni.

THLUAK SAWIZAWINA

AZP CROSSWORD NO. 4066

1					2		3		4
				5					
6				7					
					8			9	
	10								
			11	12			13		
							14		
	15	16							17
18							19		
				20					
							22		
21									

PHEI : 1. hmin/sawm, 2. ran hmul chah tak nei, 5. ram tha lo, 6. nek/nawr, 8. tipem/tina, 10. keng/ak, , 11. thal khaw rum lai, 14. insawi fihlim tum, 15. tui chungah zin theihna, 19. mutna, 20. ruahtui tam lai hun, 21. pa chi khat, 22. nupui (hla thu)

CHHUK : 1. natna chi khat/chet thei lohna, 2. puithiam, 3. rapthlak, 4. thui zawng tehna, 7. rih zawng/bukna, 9. hmeichhia ni lo, 10. buh tel khat, 12. nu leh fa inang, 13. thaw chhuak tha thei lo/thinlung zing, 16. tumbu ang tak te tak te, 17. la kaihna, 18. fei lo/chat sam

No. 4065 chhanna

	B	I	L		A		T	H	A	M
K			A	W	K			M		U
H	L	U	I			E		U		R
O			M			N	E	L		A
	K	H	U	A	N	G			D	
A							A			U
K							L	U	H	L
S		Z	A	U				U		H
A		O		N			S	A	W	N
W		E				N	E	U		A
T	H	I	K			I	N	E	M	

SuDoKu

No. 4068

	2							1	
		1		5					
		6		8	2	1		5	
				4					7
	9			6		3		2	
7						8			
		4			1	8	6	9	
							4	8	
	1								7

SuDoKu

Khelhdan tur:

Number 1 atanga 9 dahkhah tur a ni a, number inang, a inzawnin dah awih a ni lovang, thluak hmanga uluk taka ngaih-tuah tur a ni e.

SuDoKu No. 4067 chhanna

6	5	8	9	7	4	3	2	1
4	3	2	1	8	6	9	7	5
1	7	9	5	3	2	8	6	4
7	6	3	4	2	1	5	9	8
8	1	5	7	9	3	2	4	6
2	9	4	6	5	8	1	3	7
5	4	7	3	1	9	6	8	2
3	2	1	8	6	7	4	5	9
9	8	6	2	4	5	7	1	3

A nupuiin Wongchuk-a an dahna ring zo lo, damdawi in danga sawn duh

Delhi-a Jantar Man-tar-a a thil phut lantira chaw a ngeina hmun atanga Delhi Police-in damdawi ina an sawn hnuah activist Sonam Wangchuk chu sorkar damdawi inah enkawl a ni a. Hetih lai hian a nupui chuan an enkawlna damdawi in chu ‘a ring tawh lo’ ti sawiin high court-ah sawn a dilna ngaihtuashak hmanhmawh turin a ngen.

Wangchuk-a hi Inrinni khan police-in ‘damdawia enkawl’ turin’ an hrui a, Vardhman Mahavir Medical College (VMMC) & Safdarjung Hospital-ah dah a ni a. A nupui, Gitanjali J Angmo-i chu a pasal an enkawl danah a lawm lo hle.

Angmo-i chuan X-ah, “Safdarjung Government Hospital hi ka ring tawh lo,” tiin a tar lang.

“Sonam-a potassium chu 2.9-ah tlain nunna ata-



na hlauhawm niin an sawi a. Chutih laiin public health bulletin an tihchhuahah a zat tak hi an tar lang lovin ‘potassium level’ a tlahniam tih chauh an sawi a. A hrana laboratory-a ennaah chuan 3.5 niin a pangngai huanga awm a ni,” a ti.

“Kan ngen nawn mawlh mawlh chungin kan chhuah leh kan duh anga mi mal damdawi ina insawn

min phalsak lo va. Kan awmna chhawngah hian police 30 vel an awm reng a, damdawi in pumah 100 chuang an awm a, kan chet vel khuahkhirh a ni a. Hetiang hi inenkawl a ni lo, dan lova inhrenna a ni,” a ti.

“Sonam-a chungah hian eng pawh thleng se damdawi in thuneitute leh sorkarin a mawh a phur vek ang,” a ti bawk.

“High court-ah thlenin vawiina ngaihtuah nghal turin ka ngen a, a hriselna a chak loh tak tak hmaa Sonam-a damdawi ina sawn thuai phal turin ka tawng-tai,” a ti.

Safdarjung Hospital chuan Pathianni khan Wangchuk-a hi ‘damdawia enkawl’ mamawhna ang pek’ a ni a, enkawl zui a la mamawh tih an sawi.

Health bulletin an tih-chhuah thar berah Wangchuk-a taksaa pawimawhte chu ‘tun dinhmunah chuan a tha’ an ti a, a thisen kal vel bik erawh ‘vil ngai’ a ni tih an tar lang tih news agency ANI chuan a tar lang.

“...mi thiam bik rual awmna team hrang hrangin uluk taka enkawl zel a la mamawh a ni,” an ti.

Wangchuk-a hi exam hrang hranga thil dik lo thleng avangin Union Education Minister Dharmendra Pradhan-a ban phutin chaw a ngei a, ni 20 a ngei hman thihin Inrinni khan tihluhna nen damdawi inah dah a ni.

Cockroach Janata Party (CJP) chuan Jantar Man-tar-ah ban phutna an lantir zui zel a, Thawhtanni parliament session tan niah parliament thleng kawng zawh an tum.

India-in Hasina-i thawwn haw dilna ngaihtuah mek

India chuan Bangladesh-in an prime minister hlui, Sheikh Hasina-i thawwn kir tura an ngenna chu chhangin ngaihtuah mek a ni a, dan anga tih ngaite en fiah mek a nih thu a sawi.

Hasina-i hi August, 2024-a zirlaite kaihhruaia a sorkar laka lungawi lohna lantira paih thlak a nih hnuah Bangladesh chhuahsanin thenawm ramah hian a tlanchhia a, a la awm ta reng a ni.

Thawwn haw tur hian a sorkar paih thlak hnuah sorkar lailawk din, Muhammad Yunus-a kaihhruai khan an lo dil tawh a. Kumin kum tira Prime Minister Tarique Rahman-a kaihhruai Bangladesh Nationalist Party (BNP) sorkar thar ding pawhin Delhi a dawr leh tawh a ni.

Hemi chungchangah hian Indian external affairs ministry thupuangtu, Randhir Jaiswal-a chuan Zirtawpni tlaia thuthar lakhawmtute a kawmnaah chanchinbu mite zawhna chhangin Bangladesh-in Hasina-i leh mi dangte hawtir an dilna chu, “Thawwn haw turin ngenna kan dawng a. He ngenna hi a hma pawha kan lo sawi tawh ang khan en chian mek a ni,” a ti.

“Ngenna hi ngun taka zir chian a ni a, dan angin thil a kal em tih te leh dan hnuia tih ngaite a awm em tih pawh en mek a ni,” a ti.

India-in Hasina a kawl tlai hian inthenawm ram inkawmngaih tak thin pahnihte inkar pawh eng emaw chen a tichhe phak a, Rahman-a sorkar a din hnuah tlem in pawhna thar a awm leh ta deuh zawk.

Lok Sabha Speaker Om Birla chu February



thlaa Rahmah-a prime minister atana lak luh inkhawmah khan India aiawhin a tel a, April thla khan Bangladesh Foreign Minister Khalilur Rahman-a’n New Delhi a tlawh zui bawk.

Hetih mek lai hian mi rama tlanchhiaa awm ni chunga Hasina-i’n thuthar lakhawmtute a kawm leh langsar taka a che chuan Dhaka a tithinur hle tho va. Tun hnai lawkah pawh khan prime minister hlui hian an ramah thi turin a chungthu rel ni mah se December-ah haw a tum thu pawh vantlang hmaah a la sawi a ni.

Bangladesh thuneitute chuan chanchinbute chu Hasina-i thu sawite langsar taka puang lo turin an ngen a ni.

Bangladesh ram dintu, Sheikh Mujibur Rahman-a fanu kum 78 mi, Hasina-i hi November thla khan an rama special tribunal chuan amah awm lo mah se amah duh lohna lantirtu zir-lai hnawh darh tuma a chet dan chu ‘mihring nihphung bawhchiatna lian’ tiin thi turin a chung thu a rel.

Hasina-i hian hremna an pek chhan hi phain dan bawhchhiaa an puhna leh amah an puhna dangte chu ‘politic thil vang’ niin a sawi.

Dhaka-in thawwn haw

tura New Delhi a ngen fo hnuah kar hmasa maiah khan amah ngei hian December thlaah a haw tur thu a puang a, hei hi tu nawr lu-ihna mah a ni lo va, thawwn haw thil pawh ni lovin ama duhthlanla ngeia ti a ni tih a sawi.

Bangladesh State Foreign Affairs Minister Shama Obaid Islam-i chuan, “Hremna puan a nih atang khan kan mi puh hian dan anga inpek theihna a nei tawh lo va. Bangladesh-a a lo kir turin man a ni ang, chu danin a phut a ni,” a ti.

Minister chuan, “Hasina-i chungchang hian Bangladesh leh India inkar a tichhe dawn em tih lam ka ngaihtuah lo va. Kan inkungkaihnna chu a la awm reng a ni,” a ti bawk.

Thawhtanni kal taa Shama-i’n hetiang a sawi tukah Prime Minister’s Adviser for Information & Strategy Zahed Ur Rahman-a chuan Hasina-i’n haw a tum chu ‘lawmawm’ a tih thu leh dan angin a chungah thil tih a ni dawn tih a sawi a. Hetih rual hian court-in a ngaihtuah nawn thei a, thiam a chantir thei bawk tih a sawi a. An rama haw a tum chungchangah sorkar chuan engmah buaina emaw, ruahmanna hnan emaw a nei lo tih a sawi.

Speaker-in Sena UBT MP parukin Shine-a an zawmna pawm, TMC hel tan thutna hnan siam dawn

Lok Sabha Speaker Om Birla chuan parliament fur thuthkawm tan hma lawkin Shiv Sena (UBT) MP parukten Maharashtra Deputy Chief Minister Eknath Shinde-a kaihhruai Sena an zawmna a pawm-sak a. Hetih rual hian Trinamool Congress (TMC) MP hel 20-te thutna tur hnan siamsak turin a pawm bawk.

West Bengal-a MP hel-te hian an state leh Tripura-a party tenau tak, Nationalist Citizens Party of India (NCPI) nen an inchhun fin tih sawiin Lok Sabha pisa lawk ber atangin pawmpuina an dil a ni.

TMC helho chungchang hi ‘ngun taka thlithlai mek’ a nih thu leh ‘thutluk-na pawh siam thuai a ni ang’

tiin rorelna in pisaa hotu sang pakhat chuan a sawi a. MP pahnihte pawhin ni hnih khat hnuah party dang an zawmna hi pawm a ni dawn tih an sawi ve bawk.

Rorel lai, National Democratic Alliance (NDA) chuan Lok Sabha-ah MP 319 an nei dawn ta a, heti chung hian hmun thuma thena hmun hnih, 360 tling turin member 41 thlawpna an la nei belh a ngai a. Sena hi TDP dawta tangruala MP ngah ber niin Lok Sabha-ah 13 leh Rajya Sabha-ah pahniht, a vaim member 15 an nei a ni.

Lok Sabha-a Table Office-in Inrinnia pawn lama chhuak lem lova circular a tihchhuahah, “Lok Sabha-a Shiv Sena UBT member

parukten an awmna party an thlakna hi ngaihtuah a ni a, Lok Sabha 18-naa an awmna party chu tihfel a ni tawh,” tiin tar lan a ni.

Circular-ah hian Shiv Sena-in MP 13 a nei ta a, Sena UBT-in pathum an a nei tih tar lan a ni a. Circular-ah hian TMC member 20-te chu a hnanin an thu dawn tih tar lan a ni bawk.

Speaker-in hetiangah thutlukna a siam tuk, Pathianni khan Thawhtanni atanga session tan tur atan all party meeting koh a ni a. Sorkar pawhin TMC hrui-aitu hel tate hi an awmna thar, NCPI aiawha tel turin a sawm.

Parliamentary Affairs Minister Kiren Rijiju-a chuan Sudip Bandopadhyay-a

hnenah, “Tun hnaiah nang leh MP 19-ten NCPI in zawm a, speaker hnenah pawh pawmpuina in dil a, hei hi thlithlai zui mek a ni,” a ti a. Bandhopadhyay-a hian Inrinni zan khan Prime Minister Narendra Modi-a a hmu bawk.

Rajya Sabha-a TMC hrui-aitu, Derek O’Brien-a chuan speaker-in thutna hrana thut a phalsak chu a sawisel a. “Mipui rorelna hmuhsitna a ni a. Speaker hian phatsantu MP 20-te TMC MP angin a la ngai a. A hnu lawkah Modi-Shah speaker-in parliament-ah pisa hnan leh thutna hnan a siamsak dawn tih a sawi a, hei hi NCPI nena an inza-awmna a pawmpuina anga ngaihi a nih thu a sawi bawk.

Bandopadhyay-a leh Kakoli Ghosh Dastidar-a

kaihhruai TMC helte hian June 14 khan Birla hmuin party dang nena an inza-awmna pawmsak dilna an theh lut a. Hetih rual hian Sena MP parukte pawhin Birla hnenah hian hetiang ngenna bawk hi an theh lut a ni.

Birla hian rorelna ina an hrui-aitu, Abhishek Banerjee-a telin TMC pahniha an hrui-aitu pawh a kawm a, Sena UBT hotu lawkte pawh a kawm.

Kar kal ta tir lamah khan TMC hel hrui-aitu, Ghosh Dastidar-a chuan speaker-in parliament-ah pisa hnan leh thutna hnan a siamsak dawn tih a sawi a, hei hi NCPI nena an inza-awmna a pawmpuina anga ngaihi a nih thu a sawi bawk.

RAM PAWN

US leh Iran inkap zel, Jordan-ah US sipai pahniht thi

US chuan Inrinni zan khan Iran a kap leh a, sipai thuneitute chuan tuipui kama mi an thlith-laina hmun leh air defence hmunte an bei tih an sawi.

US Central Command (Centcom) chuan Iranian sipaite thil tam tak an kap tih a sawi laiin Iranian sorkar chanchinbu pawhin Strait of Hormuz-a Qeshm Island kah a ni tih a puang.

Centcom hian Zirtawpna Jordan beihnaa US sipai pahniht thihna leh pakhat chin hriat lohva awm mekna chu Iran-a Revolutionary Guards (IRGC) tihah a puh.

Iran-a sipaite chuan an ram beihna chhan let nan drone hmangin Kuwait-a US base pahniht an kap ve tih sorkar chanchinbuin a tar lang.

US leh Iran hi tun hnaiah an inbei nasa hle a, vantlang mamawh thilte inkahsakah an inpuh tawn mek bawk.

Inrinni khan Iran chuan Kuwait-a American sipaite hmun pawimawh tak, Camp Udairi leh Al Salem Air Base chu ‘kamikaze drone thahnem tak hmangin’ an bei niin IRGC hnuia Tasnim news agency chuan a sawi.

Centcom chuan a zawn zan riat nana US chetna chu ‘Strait of Hormuz-a



sundawng lawng kalte a tihhlauhthawn theihna tichh-iatna tura duan’ a nih thu a sawi.

An chetna chu ‘nizana Islamic Revolutionary Guard Corps-in Jordan-a American sipaite an bei avanga awmze nei taka a hremna pekna’ a nih thu a tar lang bawk.

Chawlhkar khat chung an inkah tawh mek laiin Washington chuan Iranian lawng chawlhna a khar a, Tehran pawhin Strait of Hormuz an khar bawk a. A hma lawka inkahhai an puan chuan thla khat pawh a daih lo.

Inrinni chawhma khan Centcom chuan, “Jordan-a US service member pahniht chu US Central Command (Centcom) leh an thawhpui sipaite nen Iranian ballistic

missile leh drone beihna an lo chhan letnaah an thi a. Service member pakhat chin hriat a ni lo bawk,” a ti.

Heng mite nen hian indonaa US lam thi hi 16 an tling ta a, tun thla tir khan American Navy pilot chu a bo hnuah a thi tih finfiah zui a ni.

Iran-ah erawh chawlhkar thum chuang kal a chhunga US beihna avangin mi 50 vel an thi tawh a, mi 500 chuangin hliam an tuar bawk niin anram health ministry chuan a tar lang.

US leh Iran hi vantlang thil beiah an inpuh tawn a. The US chuan phain Iran-in lei leh power station-te beih a nih hnuah ‘sipai hmun chauh’ an kah thu an sawi.

Inrinnia Kuwait-in power plant leh tui thih-anghlimna hmun kah a ni

ti a sawi hnuah Gulf Cooperation Council chuan Tehran chu vantlang thil beiah a puh.

Vantlang thil beih leh civil mite beih hi dan lo a ni a. Hetih lai hian lei leh power plant ang chi chu hmelmaten indonaa atana an hmang a nih erawh chuan kah phal a ni.

Washington leh Tehran hian June thla khan inremna an siam a; mahse, chawlhkar rei lo te hnuah chhe nghalin President Donald Trump-a chuan July 8 khan inremna ‘a tawp’ tih a sawi.

Inrinni zan khan Iranian Supreme Leader Mojtaba Khamenei-a chuan ziaka thuchhuah a siamah America-in inremna ‘vaw’ tam a bawhchhia’ tih sawiin ‘US hmang ziah pawh engmah a ni lo’ tih a tar lang.

Thil dang - lei leh kawng chhia pawh za tel a awm bawk.



Russia-in Kyiv a kahnaah mi pakhat thi, chhijatna thlen nasa

Ballistic missile leh hmanraw dang hmanga Russian-ten Inrinni zan (Pathianni tuk)-a Kyiv an beihnaah mi pakhat a thi a, mi 16-in hliam an tuar bawk tih tual chhung thuneituten an sawi.

Zing dar 1:30 velah Russia hi che tanin darkar tam tak an bei a, khawpui hmun hrang hrangah thil puak ri a tam hle.

Russia hian missile 41 leh attack drone 125 hmangin Ukraine hi an bei niin Ukrainian air force chuan an sawi a. President Volodymyr Zelenskyy-a chuan missile tam zawk hi an khawpui bituma kah chhuah a ni tih a sawi.

Beihna avang hian Kyiv-a district pangaah kangmei a chhuak a, chenna in, pisa leh industry hmun, dormitory leh lirthel tam tak a chhia tih State Emergency Service chuan a sawi.

Sviatoshynskiyi district-ah chhanchhuah hna thawktute chuan mi mal



in kang atangin mi pali an chhanchhuak a, Shevchenkivskiyi district-ah in chhawng thuma sang kang atangin a chengte an chhanchhuak bawk a. Mihring chen lohna in pakhat kang chu thelh mih a nih hnuah mi pakhat ruang an hmu zui a ni.

S o l o m y a n s k y i, Desnianskiy leh Dnipro district-ah pawh kan thelhtu an chet chhuah a ngai bawk.

Russian defense min-

istry chuan Kyiv-ah hian Flamingo drone leh Neptune guided missile part siam chhuahna hmun telin Ukrainian sipaite hmun an bei tih an sawi a. Heng hmunte hi ‘hmanrua leh drone rem khawmna, robotic system leh electronic warfare bungrua siamna’ a nih thu an sawi.

Russia hian tun hnaiah Ukraine-in Russian ballistic missile kan thlak nan a hman thin ber, Patriot air

defence system an tlakchham mek laiin Kyiv hi a bei nasa hle.

US President Donald Trump-a chuan Ukraine hnena Patriot interceptor missile siam chhuah phalna pek tumin hma a la mek tih a sawi a, hei hian Kyiv-in Russian ballistic missile hmanga a beihna laka a himna tur a tichak thei dawn a. Hetih rual hian engchenge an thlen tawh tih a chiang lo.

China-a mi pariat thihna lei minah chhanchhuah hna thawk zel

China chhimthlang lam, Chongqing khawpuia lei min nasa tak, mi pariat vel thihna leh mi 34 chin hriat lohva an awm meknaah chhanchhuah hna thawktute chuan Pathianni khan dam chhuakte zawngin an hai chhunzawm.

Zirtawpni zing khaw var hma khan khawpui dai, Pengshui County-a tlang awih chu minin lung leh lei tam tak a tla a, chenna in 10 chuang a chhilh.

Pathianni tuk khan chhanchhuah hna thawktu eng emaw zatin ip serthlum rawng nen hna an thawk zui a. Lak chhuah an nei em tih erawh finfiah a ni lo.

Sorkar broadcaster CCTV chuan in 21 chu lei



min hlauhawmna huam china awm tiin a chengte sawn chhuah an ni tih a puang a. Thuneitute chuan tlang awih leh hmun hniam lai, chhijatna thlenna atanga km khat biala awm mi 1,100 chuang sawn chhuah hna

an thawk tih Chongqing thuneitute chuan Pathianni khan WeChat-ah an tar lang.

Thuneitute chuan dam chhuak mi 10 zinga pakhatin damdawi in a chhuahsan a, pakuate dinhmun a

tha tih an sawi a. Mi pariat thiin lak chhuah an ni tih an sawi.

Inrinni khan thawktute chuan uisathiam leh detector nen dam an la awm tih an hmu thei a, mi pakhat emaw lei hnuahia a la dam niin an hria a. Hetih lai hian thawktute chuan la chhuak turin a dang chim belh a awm phah theih avangin ruahmanna uluk taka siam a ngai tih an sawi.

Lei min hi lung leh hnawl cubic meter 18,000 chuang niin lung pakhat phei chu cubic metre 3,000 vel a ni tih Pengshui County-a Planning & Natural Resources hotu, Wang Chuanjun chuan Zirtawpni khan a sawi.



RK Dawla
Mb 9366095658

SUSTAINABLE, INTEGRATED FARMING IN MIZORAM - 29

1. July thla laihawl, 2026 kan hmang mêk a. Maian zik êng case a tam hle. Hei hi chhan hrang hrang chi thum a awm thei a. Pakhatnaah chuan maian zung tibâwktu ruhût vang. Lei thaw deuhah a awm duh a. Maian zung kha pawt phawi ila, a zungah kha bâwk a awm thluah ang. A bâwk chhung kha kkeh ila, microscope-ah kan en chuan, ruhût a awm fur ang a, a lian tawh deuh chuan an kâ-ah perek ang deuh an hmuam fur ang. A dam thei lova, a inven theih thung a. Compost emaw oilcake thûm khat maian bi bulah phum khan a veng thei a. Oilcake tih hian hriak-nei thlai rah herna tiin an rawn bawm a, an tâng ta a. Thlai zik an bawm hmian thil-eng-banah khan an tâng hlum a, thlai a him thung. Pathumnaah chuan, Micronutrient (a bikin Iron) tlakchham vang a ni. Hei hi chu tihdam a harsa lutuk lova. A zar eng chin kha tan ch-humin, maian bulah compost/oilcake

pe-a, rihvur leh hnu khan a kung buk kha Micronutrient (Iron telna) - Jagromin, multiplex etc hmanga kah tur a ni. Maian a lo zam tan a, kan sik zo chiah tih khan kah a fuh ber a. Iron hi a rit a, kawr kam leh tuihawk tamnaah chuan ruahtuiin a len bo (surface erosion) - emaw lei thaw deuhah chuan lei chhungrilah a pût bo (leeching) thin. Kan hriat tur pakhat erawh chu, het- ianga maian zik engte hi mihring leh ran ei atân a hlauhawm loh. Compost/vermicompost hmanga maian chinte hi a zik a eng ngai lo tluk a ni. Chuvan- gin, maian eng vanga kan buai thin a nih chuan, a invenna hi kan ngaihpa- wimawh a tul e.

2. Nimbu a rah tan mêk a. Hmun hniam deuhah a rah hma a, a rêm hma a. Hmun zosâng deuhah a rah tlaiin a rah rei deuh thin thung. Nimbu hi a tar ve duh hle a, a rah a tlêm thin. A tang upa leh chang lutuk tawh, hling chauh ngah, hnah pu tawh mang loho hi a zar hnuai lamah a tam duh a. Hengho hian natna an chharin, thlai chaw siam an ei hek a. Paih thawl peih a tangkai êm êm. Nimbu tang/zâr tangkailo paih thawl hun t ha ber chu, a rah hunlai hi a ni. Hetih lai hian, rah ve lo, zar upaho kha hriat hran a awlsam a. Tin, thil chik deuh tân chu- uan, a rah lawh zawh veleh pawh hian paih tur a hriat theih viau bawk. Nimbu hi a tui sâwr emaw a rah puma hralh to tur chuan, mi nawlpui thar hun aia hma- ah thar a ngai a. Favang ral hmaa a t

ang upa leh hnawk paihsak vek bâkah, October - Nobember atangin a kung bul kual vel hnim samna ilo hmanga mulch leh, November atanga tui pêk fo hian mi thar hma-in, tam tak raha thar theih a ni a. A practice tawh chuan, an zawng chhang thei hle thin. Mi chin ang ching a, mi thar huna man to taka hralh tum ngawt kha a fuh chiah lova. Mi aia pên khata thui pên peih leh huamte tâ tur a ni, hlawhtlinna hi chu!

3. Tlangram kumkhat thlawhhma neiho hian thlam bulah zêm an kual a, chutah chuan bawhlhlawh tinreng an paihkhawm a. Favangah zem hual velin thlai an ching leh a, a tha duh êm thin. Thingtlang lo nei tam zawkten, ram lama kan practice thin hi, in lamah kan uar ta lova! Thingtlangah hi chuan, hmunhma awl remchang a tam thin. t awih thei paihna zêm hi In bulah pawh kual ila, chhungkaw khat chauh mai ni lovin, chhungkaw 4/5 pawhin tawih thei paihkhawm ila, kum khat a vei meuh chuan, automatic-in lei tha kan thar nual thei ang. Tunlainin vaimim kâwr, fanghma/dawnfawh velna kâwr kan paih tam êm êm. Heng hi paih khawm ngat ila chuan, darhsarh taka thil tawih ral mai mai tur kha lei tha tam tham takah kan chantir ngei ang. Kan ni tin nun hman leh farming hi kan suihzawm thiam tam poh leh, resource luangral a tlêm ang a, kan hlawk telh ang a, kan sustainable telh telh dawn tih hi i hre reng fovang u.

NEET-UG 2026 RESULT-AH MIZO TEN HMA KAN SAWN

Dr. Zirlianngura
Govt. Zirtiri Res. Science College,
Durtlang

India ram chhunga Sawrkar, Private leh Kohhran enkawla MBBS, BDS, BAMS, BUMS, BHMS, BSMS, BASLP& B.VSc & AH zir turte thlanna (Common Entrance) hi National Eligibility Entrance Test (NEET-UG) tih a ni. NEET-UG pass lo tan a chung course chi hrang hrang kan rawn tarlante hi zir theih an ni lo. Kum 2025-a Mizoramin a chung zirna kan han sawi te kan neih zat chu hetiang hi a ni – MBBS-ah seats 79 (RIMS Imphal – 7 seats, Govt Agartala Medical College – 2 seats leh Zoram Medical College - 70 seats). BDS-ah seats 12, BAMS-ah seats 2, BHMS-ah seats 3 leh GASLP-ah seat 1 a ni. Mizoram bikah chuan B.VSc & AH hi NEET (UG) kal tlanga allotment pek a ni ngai lo (SMATEE atanga pek an ni thin), kumin atang erawh chuan NEET (UG) kaltlanga allotment hi siam tawh tur a ni.

NEET(UG) hi kum 2012 atanga buatsaih tan tura tih a nih laiin, State tam takin an sawisel avangin kum 2016 atangin neih tan a ni. A tirah chuan Central Board of Secondary Education (CBSE) in a buatsaih a, kum 2019 atangin National Testing Agency (NTA) in a conduct ta a ni. NEET-UG hi kum khatah wavi khat exam thin a ni. Paper leh pen hmangin, Offline-a exam a ni. Exam pattern hi tih danglam fo a ni.

NEET(UG) exam-ah a vaiin multiple choice questions 180 a awm a, heng questions 180 te hi compulsory vek an ni. Hetah hian Physics leh Chemistry questions 45 ve ve a ni a, Biology (Botany leh Zoology)-ah questions 90 a ni thung. Question pakhat chhan dikah 4 marks pek tur a ni a, pakhat chhan dik lohah 1 mark paih thung tur a ni. A pumpuia full mark chu 720 a ni. Exam hun chhung hi 180 minutes (3hrs) a ni. Mizoram-ah chuan Aizawl-ah chauh exam center hi a awm thin a. Kum 2022 atangin Mamit hi exam center turah an tel a ni. Mamit a telna chhan chu aspirational district a nih vang a ni. Mahse, Mamit hi kum 2025-ah an rawn paih a, Mizoram-ah chuan Aizawl-ah chauh NEET (UG) exam center a awm ta a ni. Aizawl-ah chuan zirlai exam tam dan azirin Institution hrang hrang – college leh HSS-ah te exam thin a ni.

NEET(UG) -2026 hi 3rd May 2026 (Sunday)-ah exam a ni a. Vanduaithlak

takin he exam hi question then khat lo hre lawk an awm avangin National Testing Agency (NTA) chuan a cancel a. NEET(UG) exam hi cancel ngai kawpa a awm wavi khatina a ni. Hemi khawpin NTA chuan kum 2027 atang chuan online (paperless) a exam a nih tawh tur thu a puang zui nghal a ni. Mizoram-ah pawh online a kan zirlaite an exam ve theih nan, state pawn kal ngai lo turin Mizoram sawrkar pawh a lo in puahchah tan a ngai hle awm e.

NEET (UG) 2026 hi ni 21st June 2026 (Sunday)-ah exam that leh a ni a. Hetah hian exam tuma inziak lut zawng zawng mi 22,79,743 an nih laiin, mi 19,99,895 chauhin an exam a. Exam zat hi kum dang ain an tlem ta hret a ni. Hei hi a chhan ni thei anga lang chu exam nawn peih lo, phur lo mi tam tak an awm vang a nih hmel hle. NEET (UG) exam that a ngaih avang hian India sawrkar leh zirlaite pawhin sum leh pai, tam tak an sen thlawn phah a, a pawi tak zet a ni. Hetiang ang hi chu eng entrance exam-ah pawh thleng nawn tawh lo se duhtusam a ni.

NEET (UG) – 2026 exam results chu ni 16th July 2026-ah a chhuak a. Mi 11,21,185-in cut off mark hmuin, Under Graduate Medical and allied courses zir thei turin an tling a ni. Hetah hian Tribal mi 63,716 an tel ve a ni. Mizoram atangin mi 2,624-in exam form an submit a, chuta tangin mi 2,166 an exam a, mi 1,353 ten cut off mark an hmu a ni. India ram pumpuia cut off mark hmu pha hi 56.06% a nih laiin Mizoram bikah chuan mi 62.46% in cut off mark an hmu pha a. All India level aiin kan sang zawk a, a lawmawm hle a ni. Pass mark hi kuminah Tribal tan 177/720 (40th Percentile) a ni a, ni-kum lam aiin sang mahsela pass hi kan tam zawk a, a lawmawm hle mai.

NEET (UG) 2026 exam-ah hian India ram pumah Aryan Gupta, Punjab a mi chu pakhatna niin Mark 715/720 a hmu a ni. A mark hmuh hi percentile zawnga dah chuan 99.9999 a ni. Pahnihna chu Haryana mi Panshul Bansan a ni a, ani pawh hian mark 715/720 a hmu a, mahse

NTA in ranking criteria a siam danah pahnihna a ni thung. NEET (UG)-2026-ah hian perfect score an tih full mark (720) hmu thei hi an awm lo a ni.

Mizoram-ah chuan H. Malsawmdawngzuala s/o Lalsangzela Hauzel, Khatla Veng chuan NEET (UG) 2026-ah Mark 595/720 (percentile - 99.40602) hmuin fal takin pakhatna a ni a. India ram pumpuiah 11,875-na a ni a. Tribal zingah phei chuan 83-na a ni pha hial a ni. H. Malsawmdawngzela hi NEET (UG) exam tawh zawng zawng zingah a la ti tha ber lawr lak a ni. Mizoram bikah chuan Cynthia Lalhlupuii Shangpliang d/o Dr. Zonunthari Falkland khan NEET (UG) 2025-ah 474 mark (percentile- 96.0882934) hmuin Mizo zirlai zingah NEET (UG) exam tawhah chuan ti tha ber nihna a hauh a. He dinhmun hi H. Malsawmdawngzela hian a rawn khum Chiang ta hle a ni.

H. Malsawmdawngzuala hian Class XII (Sc) hi St. Pauls HSS atangin 2025 a pass in, Mizoram pumah 3-na a ni a. NEET inbuatsaihna atan hian Zawibuk Zirna Run, Aizawl-ah Coaching kal a ni. Ani hi State entrance Exam (SMATEE) 2026-ah khan Mizoram pumah 1-na a ni bawk.

NEET (UG) 2026-ah hian nasa takin Mizo zirlaite hian hma kan sawn a. A lawmawm tak zet a ni. Mark 400/720 chuang hmu pha hi mi 100 vel chu an awm hmel a. Mizoram quota atanga MBBS zir tur cut off mark hi kum 2025 khat 337/720 vel a nih laiin, kum 2026-ah hi chuan 420/720 vel a nih a rinawm a. Tin, State hrang

Wawiin Changvawn

Thufingte 25: 17

Thenawm inah leng lutuk suh,
A ning ang che a, a haw hlauh dah ang che.

THE AIZAWL POST

Editorial..... ✍

Mizo Daily Newspaper

Police tha leh khawtlang ralmuanna

Thenzawl Police Training School-a police constable passing out parade hmanpuitu chief minister Pu Lalduhoma chuan khawvelah police tha nei ramah khawtlang nun a ralmuang thin, tiin a sawi a.

The Global Safety Report 2025-in khawvel ram hrang hrang dinhmun a zirchiannaah India hi law and order kengkawh tha indawt danah ram 180 zingah 47-na a ni a. Tehna pakhat, “safe to walk alone at night” tihah chuan, ram 144 zingah 59-na a ni. (Law and Order Index hi crime statistic a ni lo tih kha lo hria ila).

Law and Order Index hi zawhna 4 atanga lak a ni a: In bialtu police te i ring taw em?; Zan lama mahni chauhva kea kal i ngam em?; Thla 12 chhungin pawisa/ thil an ruk sak che em?; Thla 12 chhung khan kutthlak/rawk i taw em? tihte a ni.

Heng zawhnate hian khawtlang ralmuanna atana police-te pawimawhna a tarlang a. Safety Report-in a khaikhawmnaah, 2024 khan khawvel pum huapin 71% in police an ring taw, a ti. Ram thenkhat, hetia han ngaih mai pawha indona avanga buai rup rup thin anga lange hi he report-ah hian an sang viau zel a, an score san nachhan chu ram buaina aiin mihring leh mihring

inkara pawikhawihna (rukruk, kutthlak) chungchanga an fihlim that vang niin a lang.

India-ah rau rau pawh, Mizoram hi law and order lamah chuan kan score a sang viau maithei e; a chhan chu lung in (prision)-a awm thei zat bithliah (capacity) aia tam daih hi jail-ah an awm deuh reng a, police lamin law and order an kengkawh tha tihna te pawh a ni thei awm e.

Hetih lai hian, kum 20 chhung zet sipai leh police uniform hlauhna/tihna/ ngainat lohna lo nei tawh thin kan nihna hi a la reh tak tak lo nge, kan police-te hian zirlohna an la nei em ni tih turin police-te hi ‘tanpuitu’ aia ‘mantu’ anga kan hriatna hi a la lian zawk niin a ngaih theih. Tunhma deuh kha chuan, naupang thuawih lo/tap thlem nan ‘police ka mantir ang che’ tih kha leklam taka neih a nih thin kha.

Tunah chuan kan khawhawi te a lo zau a, ram ralmuang kan lo ni ta a, police-te pawh tanpuitu hmuha kan hmuh thiam tak avangin mipui kan zalen a, chu chu tourist-te pawhin hahipa an sawi a lo ni ta. India ramah pawh state dangte entawn tlak khawpa khawtlang leh ram leh hnam inngahna tlak ni zel turin kan police-te hian tan han la sauh sauh teh se.

hranga NEET (UG) topper an tih chhuah zingah hian Mizorama kan topper te hi an hniam fal thin hle. India ram state dangte chu sawi loh, NE State dang ho te pawh hi kan tluk lo nasa hle thin. NEET(UG) 2026-ah erawh chuan kan dinhmun nasa takin a danglam ta. Hei hi kan hauh chhunzawm zel turah pawh beisei i la. NE state hrang hrang te dinhmun han tarlang dawn i la: **(Table en la).**

JEE (Main) leh NEET (UG) te mark pek danah hian an Percentile hi sawi lar zawk a ni. Lehkha thiam tak tak te zingah pawh percentile leh percentage hi thil thuhmuna ngai kan la awm tlai a. A danglamna hi kan hriat a pawimawh hle awm e. A chian zawk nan English-in han dah hmasa ta ila *‘A percentage indicates a proportion out of 100, while a percentile indicates the position of a score relative to other scores in a data set’*.

Percentage chu mark za-ah mark kan hmuh zat kha a ni mai a, kan hman thiam leh hman than zawk a ni a, sawifiah ngai loin kan hre thei ang.

Percentile erawh chu mi pakhat dinhmun exam ve tho midang te nen khaikhinna a ni. Eg. Mi pakhat chuan NEET (UG) exam-ah 90th percentile a hmu a. Chumi awmzia chu, **exam zawng zawng atanga 90% kha amah aiin an ti chhia (mark an hmu tlem), 10% erawh chu amah aiin an ti tha, mark pawh an hmu sang zawk,** tihna a ni.

A chung a kan sawi tak ang hian Mizo zirlai te NEET (UG) 2026 examah nasa takin hma kan sawn a. Kan topper pawh All

India ranking-ah a dinhmun pawh a chhuahawm tak zet. Chu mai ni loin, exam zawng zawng atanga qualified (cut off mark hmu) pawh All India pumpui percentage aiin Mizoram percentage hi 6% laiin a tam. Hengte hi a chhan hrang hrang a awm thei awm e. Chungte chu –

Aizawl-ah NEET (UG) coaching center tha tak tak, kum thlana coaching kalpui thei, NEET exam pattern anga test series mumal taka kalpui thei kan neih tak vang.

Kan zirlaite zingah inelna thianghlim leh sang tak a awm tak vang.

Kan zirlaite tih tak zeta lehkha an zir vang.

A tawpna a kan sawi duh kum 10 hma lamah te chuan gap year la kher loin, zirlai tam zawk ten Technical courses hrang hrang zir turin an inziak tling thin a. Tunah chuan diltu leh exam kan thathnem tak avangin gap year lak a, coaching te kal loh chuan inziakh tlin a har ta hle. Hei hi a nih dan zel tur pawh a nih hmel e. Amaherawhchu, zirlai beisei awm em em lo ten, kum 2/3 te gap year laka coaching kal kan intihhmuh leh lutuk hi chu zirlaite, nu leh pa te pawhin ngun zawka kan ngaihtuah a tul hle a ni. Kum hloh teuh hnuah General line lamah kan kal tir leh tho thin si a. An kum hloh hi a uiawm em a, chuvang chuan kum an hloh tam hmaa, General line lamah kan inkaltir hma hi a fuh zawkna lai a tam hle a ni. General line lama kal te tan hian private leh sawrkar lamah pawh hna thawh tur tam tak a awm a ni.

NEET(UG) 2026-a NE state hrang hrangte dinhmun

Ranking	Name of State	Name of student	Percentile	All India Ranking
1	Assam	Shubh Prasad	99.9931	133
2	Tripura	Aibhah Roy	99.9914	166
3	Manipur	Javed Javed Hasan	99.63008	7,105
4	Arunachal Pradesh	Lirik Ete	99.55378	8,673
5	Mizoram	H. Malsawmdawngzela	99.40602	11,875
6	Meghalaya	K. Anthony Thabah	99.26791	14,455
7	Sikkim	Icha Subba	99.24741	14,777
8	Nagaland	Subhasmit A. Nayak	97.86464	42,124

Khung hnem ber Mbappe

Nizan World Cup final-a Argentina leh Spain inkhel result tarlan tur a awm hmain nimin zinga pathumna inchuh boruak leh France striker Kylian Mbappe record thar hi luh-chilh lawk ila.

Pathianni zing khan England chuan 6-4-in Qatar 2022 finalist France an hneh a; kha match-a Les Bleus tana goal hnih khungtu kum 27 mi Mbappe chuan tun tournament-ah goal 10 khung tling chihin, nizan result tarlan hman lohah goal thun tam lama a elpui lian ber Lionel

Messi chuan a khung belh zo lo a nih chuan France captain hi top scorer a ni hlen dawn a, goal 22 a thun tlin tawh hmangin Fifa World Cup-a goal khung hnem ber a nih mekna chu kum li chhung atan a ch-hunzawm phawt thei ang.

Nizan final khelh hma thleng khan kumin World Cup-ah Messi chuan goal riat khaw! tling tawhin, World Cup wavi rukah goal 21 a tilut tling tawh bawka, final-ah Argentina hian goal a thun zo lo a nih chuan World Cup wavi thuma goal 22 khaw! tling Mbappe

hi he tournament chanchina goal khung hnem ber a ni thei dawn a ni.

Third place play-off match-ah England-in si li fai tehrenga hma an hrui hnuah Mbappe hian France tan goal hnih khungin, tun tournament-ah goal 10 a ngah hman a; kum 2018 World Cup-a an champion tum khan goal li thunin, kum 2022-ah goal riat a khung leh a; 2018 final-ah Croatia hnehin Les Bleus a champion-pui a; 2022 final-ah Argentina hneh loin a team a champion-pui zo lo thung.

Baruah Chess Tournament

Mizoram Chess Association buatsaihin ni hnih chhung (July 17-18, 2026) awh 23rd Dr. D. Baruah Chess Tournament chu Inrinni khan Ramhlun Indoor Stadium-ah hlawhtling taka zawh fel a ni.

Mizorama chess tournament hlun leh ngaihhlut hlawh berte zinga mi he chess tournament hi Dr. D. Baruah chhungkuate'n an sponsor sak a; naupang zawkte hmasawna atana buatsaih thin a ni.

Kum 2026 Dr. D. Baruah Chess Tournament hiage category pali - Under 15, Under 13, Under 11 leh Under 9-te tana siam a ni a, Mizoram chhung khaw hrang hrang atangin player 88 an chhuak.

UNDER-15 CATEGORY			
Rank	Name	Address	Lawmman
Champion	Lalruattluanga	Ferrando School	Rs 3,000 + Trophy + Medal + Certificate
2 nd Position	Eric C. Lalhrualtuanga	Rosebud School	Rs 2,000 + Trophy + Medal + Certificate
3 rd Position	Vanlalvenhima Pautu	Upper Republic	Rs 1,000 + Trophy + Medal + Certificate
UNDER-13 CATEGORY			
Rank	Name	Address	Lawmman
Champion	C. Lalnuanzuala	Chhinga Veng	Rs 3,000 + Trophy + Medal + Certificate
2 nd Position	Alexander Ronald Cheng	Zomuansanga E S	Rs 2,000 + Trophy + Medal + Certificate
3 rd Position	Isak Vanlalduhsaka	Reiek	Rs 1,000 + Trophy + Medal + Certificate
UNDER-11 CATEGORY			
Rank	Name	Address	Lawmman
Champion	Chawnga Royte	Khatla	Rs 3,000 + Trophy + Medal + Certificate
2 nd Position	Zohmingsanga	Neuhof School	Rs 2,000 + Trophy + Medal + Certificate
3 rd Position	Vanlalhruaia	Mary Mount School	Rs 1,000 + Trophy + Medal + Certificate
UNDER-9 CATEGORY			
Rank	Name	Address	Lawmman
Champion	PC Laldinpuia	Reiek	Rs 3,000 + Trophy + Medal + Certificate
2 nd Position	Uriel Vanrempuia Tlau	Bawngkawn	Rs 2,000 + Trophy + Medal + Certificate
3 rd Position	Javolsie Vanlalhriatrenga	Reiek	Rs 1,000 + Trophy + Medal + Certificate

ADBBA Season Opening 2026: Team tlo leh fei BC Zotlang an champion



Mizoram Basketball Association (MBBA) hnuaiia district inrelbawlna changtlung ber neitu, Aizawl District Basketball Association (ADBBA) chuan kum 2026 chhunga an district puila tournament an buatsaih hmasa ber, Season Opening Tourney final chu July ni 17, 2026 zan khan khelh a ni a, BC Zotlang chuan 79 - 77 in Mission Vengthlang BC chu an hneh.

Final hi Armed Veng Community Center-ah khelh a ni a, mipui hall khat tlatin an fuankhawm.



Tanna hamrik a rik phat atangin Mission Vengthlang BC in inkhelah hma an hrui char char a, hun tawp a pawimawh lai chho ah an che sual a; champion tuma tuihal, veng pawn player pakhat chiah nei, kum 2015 a din tawh BC Zotlang lamin an hun tha hmuh bawh pelh lovin an chhaw tangkai a, point hnih hlu tak hmangin ADBBA Season khuhhawna kawngkapi an tlawh hawng a - champion an ni!

Most Valuable Player bihchianna
Zotlang BC fachuam, Pu K.Lalawmpuia leh Pi Ponty Lalramtluangi te fapa-Vanlalrinchhana hi tualchhunga baler tha ber huanga hming lang pha ngat a ni thin a, MSL 10 ah Zemabawk BC semi final an luh hnu khan season khat tawp inkhel lovin eizawna lamah a in-sawrbing a, a reh zui.

Tun season hian ADBBA lama division II, BC Zotlang inziak lutin, player tha a chhal ngam Zarkawt BCA player hlui Nghhaktea leh rawlthar harhvang John-a te ho nen BC Zotlang tan an rawn inlan a - hei an champion nghal!

Rinchhana hian zing lamah tha thlah lovin tun tournament pual hian inbuatsaiha a nei a, a thawhrinna chu amah leh a club in an tel zui a nih ta a nih hi.

A hnuhmana hnutchhiah lian zual phochhuak ila:
1. 2016, Puuducherry Nationals
2. 2018,MSL First Rookie Of The Year(-Tuikual Basketball Club)
3. 2021, 1st North East Championship Shillong ,Gold-(Top scorer)
4. 2022, BFI-3x3 Championship, Bengaluru.
5.2022, Nationals Chennai
6. 2022, 2nd North east Olympic championship-Gold-(MVP)-Shillong
7.2023, Mizoram Super League (MSL, 11), Gold(Khatla TBL)

Mission Vengthlang BC mang chhia!
Season hmasa ah tarlan tawh angin tum li zet final-ah an chak lo va, hei sea-

son thar kan chuangkai a, inrelbawlna nei tha club hian final-ah harsatna an tawh leh tlait!

Coaching staff thar nena inthuum chah tha an ni a, champion tur erawh chuan an player thar neih te nen an hun a la thelung lo cheu! He club thlir hian champion tura beih a hautak zia leh vanneih tel a ngaih zia a lang c hiang hle - hma an hrui char char a, an tawh thlu leh tlait si lai hi an insiam thatna tur a ni ang.

Kum 2020 maia din he club hma lam hun erawh hi chu MSL nena insuihawm chho thuai tura ngaih a ni; mahse, result zawng zawnga duhawm ber champion result an mamawh ta!

Lawmman... lawmman
A buatsaihtu ADBBA lamin trophy leh a behbawm an hlan a, chu mai a la ni lo, **The Aizawl Post Hoops Mania** lam ngen-na angin tunhnaia lekhamu tihchhuah zinga boruak nei lian tak mai, zirilaite atanga hringnun hmachawn tura thahrui peipunna atana tha zet mai, 'A malsawm ka chhiar seng lo' tih Pi V. Lalnuanpui ziah chu MVP hnenah hlan a ni nghe nghe.

Most Promising Player la phak tur rawlthar zingah keini The Aizawl Post Hoops Mania lam hian kan melh a - division III ni chunga semi final hiala in-vawrhkai thei, Zemabawk BC Jr. player tangkai leh thawhhlawk, Pu Jesse Van-rozama leh Pi H. Lalmlasawmi te fapa Elmer VL Hmangaihzuala chu lungsi takin kan thlang e.

BC Zotlang team list: Zoliansanga (Captain), Vanlalrinchhana, Samuel Lalramnghaka, John Laltaniana, Lalthangliana, Vanlalruata, Michael R Lalchhanchuaha, Remruatpuia, K.Lalhrualtuanga, Lalrinawm, Lalmangaihsanga, Benison Vanlalchhuansanga, Chanchinthamawia, Malsawmtluanga, Remruatfela Pachuau

Coach - **Lalsangliana**
Asst. coach - **Lalthanganga**
Manager - **Zonunsanga**

England record si-
amtu Bellingham



Nimin zing World Cup bronze medal inchuh match-a England tana goal khat thawthu substitute Jude Bellingham khan goal sarilh thun tling chungin tournament a khar a, Englishman zinga single World Cup-a goal khung hnem ber record thar a siam.

Mexico '86 daih tawhah khan Gary Lineker chuan goal ruk thunin, Russia 2018 leh tun tournament-a khan Harry Kane chuan goal ruk ve ve bawka tilit tling a, Real Madrid midfielder Bellingham hian record a chelhrualpuite hmakhalhin re-

cord a malkhalh ta a ni.
Kum 23 leka upa la ni chunga England record siam thei Bellingham hi semi-final-a Argentina an ngam loh tum klhan goal-ah a nil a, third-place play-off match-ah captain Kane nen luhmasak chang loin ben-a hnutchhiah an ni.

Second half minute 79-ah Bellingham luhtir a ni a, hun pekbelh minute 98-ah England goal rukna leh he inkhela goal hnuhnungber thun chungin Englishman zinga World Cup wavi khata goal sarilh thun tling hmasaber a ni zui ta a ni.

Hun rei tak chhunga England
team tha ber kan ni - *Rice*



Tun chhuan lo lan hma lawk khan England World Cup squad-ah David Beckham, Steven Gerrard, Frank Lampard, Michael Owen, David Seaman leh English star lar fu fu lo hmu tawh thin mah ila England defensive midfielder Declan Rice chuan kumin World Cup third-place play-off match-a 6-4-a France hnehtu Thomas Tuchel-a England squad kha hun rei tak chhuleit pawhin England team tha ber an nih thu a sawi ngam tlait!

Pathianni zing inkhelah khan captain pangngai Harry Kane bench lama a thut avangin kum 27-a upa Rice khan khelmual chhungah hruiatu hna thawkin captain armband a hreng a, a hoin Miami khelmualah team ropui France tlarhnung a rawk hneh hle a, inkhelh banah, "Hei hi hun rei tak chhunga England team tha ber a nih hi. Thu dik tak a ni. He nihna hi tumahin min chhuhsak thei lo ang," tiin an team a kaw!

Three Lions bronze medal kha kum 1966-a an champion hnu lama he tournament-a England thlen sanber niin, last four match-a goal thun hmasa zet chunga an tlawm zui leh danah Thomas Tuchel-a tactic khan sawisel hlawh hle mah se stand-in captain Rice chuan tournament an khelh danah an team a fak hle.

Ram dang mi manager an rawih tawhte zinga World Cup-a England thlensanpui bertu

German coach Tuchel kha South American team an tum tuma hma an hrui hnuah goal ven ringawt buaipui leh kha vanga final lut zo loah mi tam takin an ngai a; English game kan hmuh thin angin, hma an hrui hnu pawh kan huaisen takin nawr lui ngam se an chak theih mai rinna a lian.

He puhna chungchangah hian Tuchel chuan tihswal a neih loh thu a sawi thung a; FA lamin n thlawp thu an puan zui tak bawk avangin a thlengtu pakhat England an nihna tur tournament Euro 2028 thleng Three Lions boss a nih zui a rinawm.

Miami Stadium-a pathumna inchuh match-ah khan mipui 64,478 pungkhawm hmaah nuam ti taka khel tuan England an chungnung tuan chhuak a; mite'n pathumna inkhel mai mai, pressure pawh awm tawh lo ti bawk mah se an tumpuite kha World Cup hnuhnung wavi hniha wavi khat champion, wavi khat final lut bawk an nih miau avangin World Cup classic game tih loh theih a ni lo!

Three Lions hian half time-ah 4-0 tehrengin hma an hrui hman a! An goal hmahruai hi minute thumna leka Declan Rice tihluh niin, chawhlhaw hmain Ezri Konsa goal khat leh Bukayo Saka goal hnih a luhbelh leh.

France hian second half-ah inkhel thunun ve thungin, Kylian Mbappe goal hnih bakah

Bradley Barcola leh Ousmane Dembele goal khat ve ve lutin, England tan Saka penalty goal leh Bellingham-a goal a luh belh ve leh bawk.

Bukayo Saka kha England player zinga World Cup knockout match-a hat-trick siam thei pahnihna niin, a hmasa zawk chu 1966 final-a England chakpuitu Sir Geoff Hurst kha a ni.

Arsenal right winger Saka hi World Cup bika France laka hat-trick siam thei pahnihna ni bawkin, kum 1958-a France fans ngawhirtu Pele hnung zui theitu awmchhun a ni.

England tan an champion kum tih loha men's World Cup-a an chet that ber a nih rualin mi rama World Cup an khelh tawha an thlen san ber hun a ni tel bawk.

Pathianni zing inkhel kha World Cup third-place match-a goal luh tamna ber niin, kum 1958-a West Germany laka France-in 6-3 hnehna tum record kha a khum a; English-ho tan kum 2002-a Argentina an hneh hnuah tun kha World Cup-a an aia Fifa ranking nei sang an hneh wavi khatna a ni nghal.

Miami result khan World Cup match-a goal lut tam pangana luah mektu kum 1958-a France-in 7-3-a Paraguay an sawpna a nihruai pui a, kum 1982-a Hungary 10-1 El Salvador hnu lama World Cup match khata goal luh tam leh berna a ni tel.



Vande Mataram kum 150 tlin champha lawmnana Sangeet Nak Akademi, New Delhi bultuma India ram hmun hrang hrang 150-a July ni 15, 2026 zana Theatre Drama festival buatsaihah Mizoram at angin E.V.E. Drama Club leh Buannel Drama Club te an tel. He drama festival hi social media-ah live-a huai-hawt niin, India a state hrang hrang a hmun 150-ah arualin theatre drama show hi neih a ni.

E.V.E. Drama Club hian Lalengmawia Varte, Khatla lemchan ziah “Hei Hi Ka Ram - Vande Mataram” tih chu ama direct-na hnu-aiah Chanmari YMA Hall-ah an entir a, Arts & Culture Department atangin Vanlalhuma Singson, Archeologist chu khuallian niin a hmanpui a ni.

Triumph Speed Twin 1200 TFC India-ah tlangzarh



Triumph Motorcycles chuan an limited erition Speed Twin 1200 TFC chu India-ah an tlangzarh a, showroom-ah Rs 21,00,000 man a ni. Speed Twin 1200 TFC hi khawvel pumah 750 chiah an hralh chhuak dawn a, Triumph Factory Custom (TFC) badge nei motorcycle pangana chiah a la ni a, TFC badge nei hi Thruxton TFC, Bonneville Bobber TFC leh Rocket 3 TFC model te pawh an lo nei tawh.

He limited edition hi Speed Twin 1200 RS based niin, an upgrade nual a, a standard handlebar chu clip-ons-in an thlak a, hei hian a riding position a rawn tidanglam daih. A suspension pawh upgrade-in, fully adjustable Ohlins upside-down fork a hmalamah neiin, a hnungah twin sock absorber a nei a, a braking atan Brembo Stylema M4.30 calipers hmangin, Brembo MCS adjustable front brake lever a

nei bawh. Hei baka hian Akrapovic titanium silencer carbon-fibre end caps a nei a, a fuel thun khat chungin kg 214 a rit niin, Speed Twin 1200 RS aiin kg 2-in a zang zawk.

A mechanical-ah chuan Speed Twin 1200 TFC hian 1,200cc liquid-cooled parallel-twin engine neiin, 104 bhp @ 7,750 rpm leh 112Nm torque @ 4,250 rpm pechhuak thei a ni a, six-speed gearbox a nei bawh. A engine leh electronic package hi RS nen a inang a, bidirectional quickshifter a neih bakah riding mode chi thum a nei a, cornering ABS leh switchable traction control a thuum a ni bawh.

Speed Twin 1200 TFC hi Obsidian Gold paint scheme niin, metallic black base, gold detailing a neih bakah carbon-fibre an hman nasa hle a, chung zingah chuan a mudguard, side panel leh heel guard te pawh a tel a, single-piece seat ta zet mai a nei bawh. He motorcycle hi limited edition a nih avangin laser hmangin a number zat an ziak vek a, TFC logo a nei bawh. Hei bakah hian a leitu te chuan Certificate of Authenticity an dawng tel dawn a. branded motorcycle cover leh waterproof seat cover te an dawng tel bawh ang.

Phuah Pawlh

Plunger hmanga balloon tikehin record siam



Plunger chu movies-ah te pawh kan hmu fo tawh ang a, an inthiarna comode block a awm chang ten a tih tlang nan comode kuaah te pawh an sawh deuh sawk sawk thin, pipe hnawh vel tih tlang nan te pawh an hman thin. Hetiang plunger hman hian second 30 chhungin balloon 60 tikehin mi fate chuan Guinness World Records an lo siam leh tawh!

A hming chu Andre Ortolfo a ni a, kum 32 mi a ni tawh a, amah

hi German a ni. Balloon hampuar sa chu chhuatah a tlar dul mai a, chu chu a hmatiamin plunger chuan a hawlh keh ta pawp pawp mai a ni. A hmaa hetiang record chu 2025-a American Kevin Daane-a siam niin, second 30 chhungin

balloon 23 a tikeh thei a, he record hi Andre hian a rawn khum ta a ni.

Andre Ortolfo chuan, “A nuam khawp mai. Record siam tum rau rauah helhkham awm miah lovin, nuam ti takin, him takin kan ti thei. Min tinui hnem khawp mai. A titu ang bawkin a entu tan pawh a himawm a ni,” a ti.

Ortolfo chuan, “Balloon kaihnawih world record reng reng hi ka ngaihven zawng tak a ni a, a chhan pawh a himawm thin vang a ni. Plunger hmanga balloon tikehin record a siam theih tih ka hriat pawhin ka tuipui nghal em em mai a, record siam tuma beih ve hrim hrim ka tum ta a ni,” a ti.

Tun a record chu amah vekin a la khum leh theih ngei a inring a, “Hma an sawn leh theihna tur a awmin ka hria. Ka inbuatsaihna balloon ho kha second 24 chhungin ka tikeh vek hman tlat mai a, chuvangin han inzir leh hlek ila chuan balloon tam zawk pawh kan tikeh hman ngein ka ring,” a ti bawh.

BTS ‘NORMAL’ music video-in Spotify streaming record a siam

BTS hla ‘NORMAL’ music video chuan Spotify streaming record siamin, ni khat thil thua Spotify-aK-pop music video stream nasat ber a ni a, record an siam thu hi Spotify hian an X account-ah an puang a ni. ‘NORMAL’ hi an No.1 album ‘ARIRANG’ at anga an single pahnihna a ni.

‘NORMAL’ music video hi Zirtawpni kalta khan an tichhuak a, Spotify-ah hian an tihchhuah atanga darkar 48 chhung an dah nghal. A video hi Ukrainian film siamtu Tanu Muino direct niin, BTS member Jin, Suga, J-Hope, RM, Jimin, V leh Jung Kook te an inlan.

He music video hi en tur chuan beta market-a Premium subscriber ten Spotify hi TV, desktop, iOS leh Android



hmangah te an hawng thei a, ‘NORMAL’ by BTS tia search-a, play tih hmeh leh a, chutah ‘Switch to video’ tih thlan leh tur a ni.

NORMAL hla lead single ‘SWIM’ chu Billboard Hot 100 chart-ah No.1 te pawh a lo kai zak zak tawh a, he chart-a BTS hla No.1 kai thei pasarihna a ni nghe nghe.

Tecno Camon 50 Ultra 5G India-ah tlangzarh

Tecno Camon 50 Ultra 5G chu Zirtawpni kalta khan India-ah an tlangzarh a, Rs 39,999 atangin a man a inlan a, July ni 21 atanga hralh chhuah tan tur niin, Amazon-ah a chah theih dawn a, company lam chuan launch coupon Rs 3,000 hu offer an pe dawn a, thla ruk chung no-cost EMI option a awm bawh ang.

Tecno Camon 50 Ultra 5G hi dual-SIM niin, Android 16-based HiOS 16 a hman a, 4nm octa-core MediaTek Dimensity 7400 Ultimate chipset a nei bawh. 6.78-inch 1.5K (1208 x 2644 pixels) ProXDR Curved AMOLED display neiin, up to 144Hz refresh rate, 2,800Hz touch sampling rate a nei a, a display hi Corning Gorilla Glass 7i a thuum a ni bawh.

A hnungah camera pathum- 50-megapixel (f/1.8) primary sensor (1/1.5-inch Sony

LYT-700C sensor), 50-megapixel (f/2.4) telephoto camera (up to 3x digital zoom) leh 8-megapixel (f/2.2) ultrawide camera (112-degree field of view) a nei a, a hmaaah 50-megapixel camera (autofocus) a nei bawh. A camera hian 4K/30fps video a record thei bawh.

Connectivity-ah chuan 5G, 4GLTE, dual-band Wi-Fi, Bluetooth 5.4, USB Type-C port, GPS, Glonass, BeiDou a support a, in-display fingerprint sensor a nei bawh. He handset hian MIL-STD-810H military grade durability certification a neih avangin thlahu palh leh tih deuh sawk sawk pawh dawlo viau tura ngaih a ni a, IP66, IP68, IP69 leh IP69K dust & water resistance rating a neih avangin tih huh leh tua thlahu palh pawha chhe mai lo tura ngaih a ni. He smartphone hian 6,500mAh battery neiin, 45W wired fast charging a support bawh.



Cholesterol level tihhniam dan

Cholesterol hi lung (heart) lam natna hrang hrang thlentu bulpui ber pakhat niin mithiam ten an sawi a, cholesterol level sang tur inven lawk a pawimawh hle a ni. Kan nundan leh khawsak phungin cholesterol level san leh san lohah ngahawng a nei nasa hle niin an sawi a, Healthy Living Diet Clinic, Mumbai-a Sr. Registered Dietician and Diabetes Educator Sunita Pathania-i’n cholesterol vanga kan buai lohna tura kan tih tur pawimawh ni a a sawi, Times of India health section ami kan rawn tarlang e.

1. Sa ei tlem rawh. A bikin sa ti sen (red meat) ei tlem rawh, Sa hian cholesterol level a tisang thin. Sa i ei a nih pawh bawngsa, vawksa tih vel ei tam lo la, sangha ei tam zawk rawh. Arsa i ei pawhin a thau leh a vun tel loin ei thin ang che.

2. Nitin kan ei leh inah fibre 5-10 grams vel tak awm thei se a tha, chu chuan cholesterol level sang tur risk pawh 5%-in a tihnam thei.

3. Cholesterol test fo rawh, chu chuan i taksaa cholesterol awmdan a hriat tir che ang a, a pawi hmain i lo fimkhur lawk thei ang.

4. Mawm ei tlem rawh. Thil mawm ei tlem hian kan taksaa cholesterol sang tur nasa takin kan veng nghal. Chawah thlai hnah, a rah leh thei

lam te ei nasa la, nuts lam chi ei tam ang che.

5. Mawm kan ei duh a nih pawhin thlai hriak lam ei zawk tur a ni a, canola oil, olive oil leh soyabean oil lam te hman uar zawk tur a ni.

6. Nitin minute 30 tal exercise la thin ang che. Exercise lak that hi lung lam natna pumpelh nan a pawimawh hle.

7. Sangha hian omega-3 fatty acid an pai deuh vek a, chu chu cholesterol tihnam thei a ni, chuvangin kar khatah sangha vawi 2-3 tal ei tum ang che.

8. Nuts ei hnem rawh. Chawei hmain i ril a tam deuh a nih chuan thildang ei loin nuts te han hmawm zeuh zeuh la. Nuts hi a hrisel mai bakah mi a tipuar ve thei riau a, lung tan a tha tho bawh si.

9. Inti cher rawh, chu chu cholesterol level tihhniam nan a pawimawh hle. Kan san zawng leh taksa rih zawng innil tawh tur a ni a, mi thau lutuk te hian lung natna neih theihna risk an nei sang bik.

10. Tum khata thil ei tawh chin loh tur. I chawhmeh duh zawng hmeh tih vanga ei tawh mai te hian cholesterol level a tisang duh hle a nia. Vawi khata tam tak ei loin, a khat tawka tlem tlema ei a tha zawk.

11. Kein kal tam rawh. Chhuahvah dawn hlek lirtheia chuan zel hian

mi a tithau a, kan cholesterol a lo san phah thin. Kea kal hi physical activity tha ber a ni.

12. Artui ei tlem rawh. Cholesterol lama harsatna nei tan artui hi hmelma ang deuhah kan ngai thin. Mahse, artui tlem tlema ei chu a pawi hran lo, a kan nan tel tlemte chauh hman la. Artui chu ei tam i duh chuan a chhungmu tel loin, a pawn var chauh ei la, a pawi lo.

13. Green tea-ah hian catechins a tam a, chu chuan cholesterol a tihnam thei. Green tea ni khatah no 3-4 te inthei la a tha hle ang.

14. Zana mut that hian kan blood sugar level a siamtha a, rilru lam thlengin a tihrisel a, cholesterol risk a tihnam bawh.

15. Mei zu mi i nih chuan sim hlauh rawh. Mei zuk hian cholesterol level a tisang thei tlat. Mei zuk hian HDL (cholesterol tha chi) level a tihnam a, chu chuan lung natna a thlen duh hle.

16. Purunvar ei tam rawh. Purunvarah hian organo-sulphur a awm a, chu chuan kan thisena thau tha lo awm te a paihchhuak thin a, thisenzam tam a tha hle a, cholesterol level a tihnam thei. Nikhata purunvar mal 2-3 vel ei ziah theih a tha.

17. Zu in tlem rawh. I lung hriselna i ngai pawimawh a nih chuan zu i in duh a nih pawhin nikhatah no 2 aia tam in suh. Zu hian cholesterol level a tisang thei.